

Koinonia Gospel Ministry

Monthly Bulletin

Volume 1, Issue 4

April, 2019

A HOM KEO INSUNG

Insung kiti thu cheng hi leiset kisetil akipat hung kimang pan thuchang khat chu ahitai. Hinla tunikho gei a hethem lou chuleh amanlut dan helou mitamtah aki um nalai in ahi. Leiset a mihemte hi koima Insung a kipat hung khanglen lou aki um poi, hijeh hin Insung kituptah semdoh lou angaikhoh jeh a hiche thupi hi kahin tah lang ahi.

Insung ahom keo ahidan:

Mikhat chun ji anei'a, cha anei'a neilegou tampi a lamdoh theija a inchen theileh hichu Inchen achamkim dan ageljeng mi tampi aum ding tahsan aum e. Hitobang lunggel chu dih loutah ahi, hinla mitampi in kimoh dalhah theilou khat ahikit e. Chate hi gou lah a alupen, sana le dangka toh tethei hoihilou, Pathen a kon gou lupen chu ahi. Mipa minu lolhing kitichu, chate tahsa lam hihen lhagao lam hijong le aphot cha a khoukhah hokhu ahi. Nei le gou sumle pai hol na a kisaboi jeh a ainsung heimil khop hel a kisaboi mitam tah inamsung uvah hin mu thei in aum in ahi. Insung ahina bang a vetup lou chuleh chate aphotcha khou khah lou Insung chun khonung teng mipa minute dia lhoh sat na ahinpoh lutthei chuleh mipa minu adia kana ahilut thei ahi. Tuni kho a homkeo insung hina lou din chaten nule pa thu nun ding chuleh mipa minun jong thildang ijakai khohsah napeh masanga chate Pathen thua puihoi joh ding ahi.

Neile gou kihop khen dan:

Alhang pi in jatni in akihom khen in ahi. Leiset chuleh lhagao gou ahi. Leiset a hing ihinah laijeh un neh le chah, sil le chen, in le lou ho hi ngaicha ho lah a athupi pen khat chu ahinai, lhagao lam thupisah joh ding tinajoh ahi. Hoiche hokhu Insung ahomkeo kiti ham itileh tahsa lam hihen lhagao lam hijong leh midangte vetjui thei dia um lou hokhu ahiji in ahi. Insung hi tahsa lam a khantou sang in lhagao lam a khantou joh chu mihem te chuleh eisem pao Pathen lung lheina ahi. Hichun Insung lolhing ahinso ding bou ahi.

Thuchaina:

Tuni kho a gelphat dia dei um pen chu Insung lolhing semdoh nading a hi, mipa minu ten thil dang boipi masang a chate hi lhagao lam a til khou a puihoi jing ding hi athupi pen e. Mipa minu tehon chate hi leiset a gou lupen ahitoh ki lhon a, chate semphat nalam a kalson jing ding ahi. Chate lhagao lam a apilhin ding chu, nule pate dia lolhinna len pen hi ding ahi.

~Editor

KGM Diary

~ 10th March 2019 (Sunday) nikho in B. Vengnom Community Hall ah Pu Thangcha Khongsai Testimony sharing leh Concert kibolna ah Koinonia Gospel Ministry hon Ushers in kithopina aga kinei e.

~ 11th march 2019 (Monday) nikho in Trinity College & Seminary a kon in KGM member mi 4 in Graduation ana lathei uvin, KGM Family in akipapi cheh uve. Amaho chu ahileh: i) Gigin ii) Carolyn iii) Kimneo iv) Boilen v) Haoneo.

~ 17th March (Sunday) 2019 nikho in Nu Hoineilam W/O (L) Paochon Singson chu JNIMS a operation thisan ahideha (Negative -) unit khat blood bank a kilaba chu KGM Director Gl. Joseph lunminthang Lhungdim in tomngai sona ngailutna jallin athon leuleu vin apen aditdoh tan ahi. Hitabang lamkai inei nau chungah kipa umlleh e.

~ 17th March 2019 (Sunday) nikho in Evan. Paulneo Kipgen in hinkho a dinga adeilhen a inneipi toh houdan thenga jinei na ana nei toh lhon in KGM in ikipa piuve/

~ 28th March 2019 (Thursday) nikho in N.Songlung KBC Church mun ah KGM member Ng. Margret in hinkho a dinga angai lut pen leh a angkoi pi dingin Pastor Seiminlen Haokip toh houdan theng in KBC General Secretary Rev.Dr.Thongkhosei Haokip in jangnopna ana neitai. Pathen in anamalm hinkho a mapui jing taken.

~ 30th March 2019 (Saturday) nikho in Koinonia in kinep pi tah a anei Gl. Letkhoson Haokip (Soson) chu SAIACS, Bangalore a M.Th (Theology) ajil chaitoh kilhon in Graduation ahin muthei tan, achung a kipa thu nasatah aki sei e. Pathen in amalam a Ministry ah mapui jing taken.

~ 30th March 2019 (Saturday) ni in KGM in Ng. Kimneo leh a insung mite ngailutna neitah in vilna aga kinei in "Charity Work" ti min pu in thilpeh na jong aga kinei in ahi.

PATE NIKHO HUNG UMDOH DAN THUSIM
(The History of Father's Day)

~Lalboi Doungel



AKIMANNA AMASAPEN

Grace Golden Clayton hin Anna Jarvis' crusade apat 'Pate Nikho' phudoh ding thanopna ana nei himeithei ahi. Fairmont a pat 15 miles (24 km) gamlha a ana um Grafton (West Virginia) kiti khopi mun a chun Jarvis in lha ni masang chun anu in ana dalhah (thisaan) na chungah ama choi atna le vahchoina kin khat ana manpeh in ahi.

Anna Jarvis in 'Nute Nikho' Grafton (West Virginia) mun a ana bol a lolhinna ana mujou vin, 'Pate Nikho' chu Fairmont (West Virginia) a Williams Memorial Methodist Episcopal Church South (tua Central United Methodist Church tia kihe) mun ah chun amasa pen dingin man in ana umin ahi. Grace Golden Clayton chun December 1907 chun, apa songmantam laidohna a toset anato, ana lunghem pi in ahi. Hichi toset na ah chun pasal 361 anathi in, hichilah ah chun mipa 250 anajao vin, cha tamtah paa (father) neilou vi nana umlo un ahi. Clayton in a pastor pa Robert Thomas Webb hengah hichi tosetna a thi pateho jana pehding ti alunggel anasei in ahi.

A khopi sung uva thilsoh dang ho jeh chun, Clayton's lunggel (thilsoh) chu Fairmont pam lam ah pohdoh in ana umpon ahi. Chuleh thilsoh dang ni chun Clayton,s lunggel chu thupi in ana gelpeh pouvin ahi. Hichi teni chu July 4, 1908 nikho a mi 12,000 vel in vetnom umtah tah thilsoh avet uva Chamlihatna nikho (Independence Day) anaman u chuleh ani channa a July 4 nikho a chapang numei kum 16 khat anathi jeh ahi. Local houbung le Council teni chun ana phalpeh pon chuleh hichi Clayton's lunggel chu ana machalsah be nom pouvin, kum phabep chu man in ana um pon ahi. Achainan Clayton chu ima jong asej nom tapon chuleh alunggel chu koima komah jong asej be nom tapon ahi.

1910 kum chun 'Pate Nikho' chu Spokane, Washington a YMCA mun ah Arkansas a anapeng mi Sonora Smart Dodd in ana mangin ahi. Pate kiman na masapen chu June 19, 1910 a Spokane YMCA anahi. Apa William Jackson Smart in a changseh a cha 6 ahin vah khang ahi. Central Methodist Episcopal Church a 1909 kuma Jarvis' Nute Nikho sermon angaina a kon in, a pastor pau komah Pate ho jong nikho khat hi ama ho geldoh a jana pehding lunggel ho anasei in ahi. Sonora in June 5 (apa birthday) chu ana deisah lheh in ahinlah a pastor pa in sermon kigotna ding phat ana neilou jeh chun June lhasung a Sunday a thum channa in vohchon in ana umin ahi. Houlhacha a pangho chun anasan peh uvin, June 19, 1010 kumin 'Pate Nikho' sermon masapen pateho jana pehding thu chu khopi sunga mijouse simthei din thejal in ana umin ahi.

Hijongleh 1920s vel lah chun Dodd in hichi pate nikho kiman ding hi ana machal sah nom pon ahi, ajeh chu Chicago a Art Institute muna lekha anasim in chuleh akichieh joulou/ akilan doh joulou phat chun ana lunglha in ahi. 1930s lah vel chun Dodd chu Spokane a akinung lekit in Pate nikho machalsah na dingin pan ahinla kit in chuleh national level gei jin mipi teho chu phatechan hetsahna anei tan ahi. Kithopina munchom chom apat in amu in, 1938 kum in New York Association Men's Wear Retailers hon Father's Day Council ana phutdoh un Dodd chu ana kithpiu vin chule Pate nikho man ding chu machalsah thei nadin pan aluvin ahi. American miten hichi hi kum phabep pi ana doudal un ahi. Newspaper ho dung ah jong Nute nikho lolhin jeh a hichi pate nikho jonghi bolding agot ahi tin totnop naleh kihou nan anei un ahi. Ahinlah Dodd le akiloipi cheng chun limsah in anakoi pouvin ahi. 1980s kum kim vel ah chun Father's Day Council in hitin lekha ana jih un ahi, "Pate Nikho hi mipa te jouse dinga kumhei ani na (2nd Christmas) ahitan ahi....."

1913 kum in Congress masang ah mipin ahet nadin hetpeh na nikho umdoh thei nadin Bill ahin koi un ahi. 1916 kum in President Woodrow Wilson chu Spokane mun a Pate Nikho kiman na ah anachi in chule mipi hetthei a aumding adeisah in ahinlah Congress te ana nompou vin, sumkolveina lam pang a hung kiheidoh get inte ti tijatna ananei un ahi. USA President Calvin Coolidge in 1924 kum in hichi nikho hi gamsung pumpi in anit dingin seihuna ana nei in ahinlah gamsung mite hetdin ana phongdoh jou tapon ahi. Congress te in hichi nikho suty a hetpeh nading a abolgot uchu nivei ana suh tang peh un ahi. 1957 kum in Maine Senator Margareth Chase Smith in Congress te lekha anathod in ana them mosah in ahi, aman aseina ah Congress te in kum 40 val jen pateho not thap in akoi un ahinla nute ho jana ana pejing un, ihing nu bou jana peh a ihingpa atum a hetpehna neilou hi thil dih ahipoi, tin lekha anathod in ahi. 1966 kum in President Lyndon B. Johnson in avaipohna sunga phondohna masapen (First proclamation) pateho jana chu ana phongdoh in, chuleh June lhasung a Sunday athum channa hi 'Pate Nikho' in het in ana umin ahi. Kum 6 jouvin hichi nikho hi a itih a gamsung a nikho khat a nit dingin President Richard Nixon in daan a dingin soi anakai tan ahi. Pate Nikho kalval in jong, International men's Day hi November 19 leh mipa hilou pasal ho a din vannoi gamtin ah man in ana umin ahi.

PATE NIKHO PHUDOH NADINGA TUPNA LOSAM:

1911 kum in Jane Adams in Chicago mun ah pate nikho man dinga ahin phut in ahinlah ana kisan peh pon ahi. 1912 kum in Methodist pastor J.J.Berringer (Irvington Methodist Church) lunggel seidoh hoa pat in Vancouver, Washington mun ah Pate chu ana jui u ahi.

Harry C. Meek, Lions Clubs International a member khat chun 1915 kum a Pate Nikho man nadia lunggel hin neidoh chu kei kahi tin anasei in ahi. Meek in June lhasung a Sunday a thum channa chu kei birthday ahijeh a kana lhen ahi ti jong ase in ahi (A pa birthday joh ana lheng leh kilom sel dinga). The Lions Club techun amachu "Pate Nikho hung kondohnapa" tin aminsah un ahi. Meek in Pate nikho tamtah vei machalsah ding lungtup ana nei in chuleh mipi het dia hetpihna neidi tohgon ana got ten ahi.

PHAT CHESA HO A VANNOI THILSOH LEH CHONNA DANHO:

Pate Nikho hi kah lah lah leh amin kikhel na umji jongleh Catholic gam phabep leh Lhumlam European gam phabep in Pate nikho hi St. Joseph kipana ankong niteng ana lom jiuvin ahi.

Argentina: Pate nikho hi Argentina ah June lhasung a Sunday athum channa in ana mang jiuvin ahi, ahinlah phat tamtah vei hi hichi nikho hi August 24 nikho a Jose de San Martin "Father of the Nation" ahung hini kho geldoh jing nadi toh goma khel doh ding hi ana gojing un ahi.

1953 kum in Pate nikho hi themjilna mun ho a 24 August hi Jose de San Martin jana nikho le geldohna a man ding hi deisah na neipum in General Direction of Schools of Mendoza Provice ah pohdoh in ana umin ahi. Hichi nikho chu 1958 kum June lhasung a Sunday athum na nikho in ana kimang masapan in ahi, ahinlah midang phabep a kon deisah louna ana umjeh chun School calendar ah ana kijaosah tapon ahi.

Mendoza province a themjilna mun ho in August 24 hi Pate nikho in ana mang jom peh un ahi, chuleh 1982 kum in agamkai Governor in hichi nikho chu pate nikho a dingin thulhuhna anasem in ahi. 2004 kum in a nikho Augst 24 chu khel dingin deisahna jat jat ahung doh in, achaina in Senate of Argentina hengah vetlahna leh seilhahna ana umin ahi. Senate chun hichi nikho chu August lhasung a Sunday athum channa din ahin khel tan ahi. Ahinlah hichi thu hi Senate kihouna sungah pohdoh a ana umlou jeh in, ana losam kit in ahi.

Germany: Germany ah pate nikho (Vatertag) hi vannoi mundang ho Mandan toh kibang lou in ana mang un ahi. Van a lahtouna nikho in ana mang jiuvin ahi (Easter a pat ni 40 jou). Hichi nikho jong hi agamsung miten Pasal te nikho (men's day) tin jong aheu vin ahi. Amaho chena dan a hichi nikho leh pasal kiti phot phot (aneo alen), sakol kangtalai a lamsaotah chijiu ahi. Hichi sakol kang talai a chu juu leh amaho pupa khang a bu, Hausmannskost tia kihe ana kipoh jiu ahi. Mi tamtah chun hichi nikho hi kingolsah naleh jukham nan ana mang jiuvin ahi. Federal Statistical Office (Germany) a kon kimu dungjui in khamna thei lam toh kisai a toset tona hi hichi nikho leh hin ajat thum in atam

jin ahi akiti. Solam germany ah hichi nikho hi amaho chenanadan lhongpi in khamna nikho in anaha chen ahi.

Hichi chena dan hi Christian te dan a lahtouna nikho (Ascension Day) a pat hung ki jungkho ahin, 18th century lai a pat a hung kimang pan ahi. Pasal ho chu thing touna ah khosung a kailhang mun ah ana kipo jin ahi, chuleh khosung vaipo pa chun mipa cha tamnei pen hochu kipaman in vohsa phe ana pejin ahi. 19th century kichai lam kon chun hichi nikho hi hou toh kisai lampang chu ana lhasam khatan, adeh in khopi lah Berlin mun ah chun kinopsah tah a judon puma hinkho man na in ana mang un ahi. 20th century ahung hitoh kilhon in judon na leh kingolsah na lampang in chenanadan in ana umdoh tan ahi. Hichi nikho chu Thursday ahiji in, ajing Friday nikho chu mi tamtah in natoh kichol na nikho in alajiu vin chuleh themjilna munho jong akikhah jin ahi. Chuleh mi tamtah in hapta li (4) tabang kinop lhana in ana mang kit jiuvin ahi.

Nepal: Nepal gam a Newar mihon Gokarna Aunsi nikho leh pateho jana pehnikho in anamang jiuvin ahi. Hichi nikho chu August lha kichai lam ahilouleh September kipat til lai leh ana mang jiu vin ahi. Lhumgam gam khangtou ho Mandan hi pohlut in ana umin chuleh amahon aman na nikho toh kitoh in Gokarna Aunsi toh kitoh in man in ana umjin ahi.

Midang hon jong Gokarna Aunsi nikho chu ahin mang pan uvin ahi. Nepal pao dan ah Abu ya Khwa Swoyegu tin akihe in chuleh Nepali pao in Buwaako much herne din tin akihen ahi (pate mai vet na nikho tidi hinte). Lhalih jan (Amavasya) nikho le chena lhongpi a chu pa teho jana peh ding hi ahi. Hindu hochu Gokarna a um Shiva temple mun ah ana chijiu vin, Buddhist hochu Jan Bahal houbuh mun ah ana chiu vin ahi.

☺☺☺**NUIBOM**☺☺☺

☺ Benglam achapa athi ni in, aloipan epibol la na chapa thinia ninkou lou ham ati le, Benglam aban a athi kit teng kan kou di atikit nupsel e

☺ Golhang khat ajan vana agei dan in, ahung kile langa nup le da umlou cemetery ahin jotpa ngai. Ale cemetery ahin phah le mithi lhah hon parade ahin bol uchu ama jong salamin amat konden...milhah ho lah left right left abol uva ama kom hung nai tul2 jeng. Ahin moh phah d phat uvin amn jong upai umlou manin PICHEMUT atile akinung leu in, atoke ke in ahung jame

☺ Tulai job card tamvalta. Upa khat in kothah asem gotle khomin sah di het lou phat in ajo jo nan NEW KHOLUI asah tai

NB: You can send your jokes to 8415934372



I TIH CHAN HI TIA HI I UM DIU HAM

T. Seikhogin Haokip
Lecturer, Servanthood Bible College

Thilpha he a kibol louna, vaicha genthei kimu a kithopi louna, thudih kihea kisei ngam louna, Pathen thu kihe a apply kibol louna hitobang society hin boina ato loule adang ipi ato ding dang a umpoi. Kum ijat hitam Kuki mi chamkhat in election ahung hiteng vote adei apeh louna? Kuki micham khat in hiche kagam ahi lou le hiche ka lou ati louna?? Hoi ham zalen gam? Hoilam Zalen na?

Tudin mun i society u ivet leh mipi zalen na/ mimal thanei na hi eiho namsung ah hin aki la mang jel tan ahi. India le Manipur Govt ingoh uvin ahin hoitah ivet leh i zalen nao lamang hi eiho mama ihuu ve. I Chennau igam u hi eihoa ahi tia igel mong mong uleh Manipur Govt le India Govt Gamtum a chomma a eikhin doh peh khel khel u nga angai poi. Hiche phat jong chu hung lung nan te hijong le tunia pat a ichennaoh khole veng gamle go chule iki vaipoh dan pao hin state muthei ihuu ihi lou u ahin photchen ding bep ahi nalai e. Kuki kahi kaki pah e, kuki kahi kaki thang at e tin zaila isem uvin hinla nahina hoitah in kihet le chun tulai tah a Kuki hi hi kithang at na ding beihel joh ahi. Tulai tah a Kuki milham khat din mun chu ana veo hite....

- i. Inn nei a inn mun nei lou
- ii. Vote nei a ama dei pe thei lou
- iii. Khosunga chenga gam nei lou
- iv. MLA nei a houpi thei lou

Chamlhat na le thanei na kiti mong mong neilou mihem chu Kuki pa ahi e. Itih chan hitia hi iki vai poh poh diu ham?? Mipi khahdoh phat ahi tai. Election ibol dan u ivet le India constitution to jong kitoh lou I Bible to jong kitoh lou in ibol jiu vin khohe pha lou milham ho vote capture ibol uvin hitia kilheng doh candidate ho chu hoiya nampia dia phachom di hinam?? Gamle nam natong dinga kipe doh candidate hon Pathen dong louvin thingnoi ho lung ihol uvin, sum ipeu vin, hoilai tah hi thudih ibol nao leh thudih iche piu nao um em?? Mipi atam jo jong tulang in imit u le ilungu a cho gamtan. Mibol thei ho le thalchoi ho kichepna hi nampi natoh dan in igel gam taovin ahi.

Sopi te, khangdoh ute... State neisanga thupi jochu thutah le thudih le chamlhatna ahi. Tunia vote ide ipeh thei lou u, haosa ho noiya ikun le le u kum seh a tax mun ni munthum ma ipeh u hiche ho hi Manipur le India Govt in abol ahi poi eiho le eihon iki bol u ahi. Tunin adih tah a Pathen dei le Pathen tun chule thudih choi le Pathen ging MP or MLA khat in agam sunga khantouna ahin pohlut ding ho chu kum ijat hamkhat i chaan u ahi tai. Aban ichan idei be nahlai u ham?? Hitobang condition a hi Kuki kahi kaki pah e nati thei mong mong nalai dem?

GENTHEI NAKI SAH EM? (Pathen toh hingkhom)



~ Thangchungnung Mate

Genthei nale Hahsatna chule lungdonna hi peldoh nading lampi aumpoi, Haosat le vaichat thu ahipoi, Hat le hatlou thu Jong ahidheh poi. Apat chu ahunglung le thoh jeng dia um ahi. Lungdon lung jin na hole ka-na hohi ipen piu ahin, minom sapen injong athoh kham anei thou² ahi. Hijeh chun Christa umhi apel dohna Lampi khatbou umsun Chu ahi.

Nalungsunga Christa mun chu, thildangin alothei pon ahi. Chirsta umna dinga Chu thildang Ema aumthei poi, Christa umna mun Chu GAP a aum² jengtan, Hijeh achu kipana, nop kasai, ka lung amonge nati vanga, Lungmon na dihtah, kipana chamkim neithei lou nahi.

Nungah Marilyn Manrose in hitin ati, "Melhoi na a Jong kaminthang tan, sumle pai Jong kadei bang² in kamang in, Tahsa nopsahna jong kabol thei Chan kabol in, ahile i-aitile. Lungmong theilou kahim?" tin PRESS ho ana dongin ahi

Nungah Marilyn in aseidoh thucheng hi na lunggil tah in gel in, Nangin Jong nanseiding nikho hunglung ding ahi.

Chirsta a umlouva kipana nahol laisen munpon natin, mu Jongle chun Guarantee phatchom chanbou hintin, Lungmon na ahi nati hojong Expiry umngen ahi. Lolhinna na Jong chirsta jaolouva lolhinthei ahi, ahin aga ahoiji poi ti kihet in, Ahin Christa a Lungmon na, kipana, Lolhinna vang Tonsot a ahi. #Amen

#Christa a naum hitam Sopi

Bible verse of the Month

Ecclesiastes 12:13-14.

13. Thu kisei ki-ngai chengse thil hijat agomsoh a achaina keiyin: Pathen gingin, athupeh chengse nitsoh keiyin; ajeh chu hiche hi mihem toh ding kin apumpia ahitai.

14. Ijeh ham itileh Pathenin na kitong jouse hi, thilpha hihen lang thilse hijongleh guhthima kitong jouse puma chu thutanna muna ahinpoh lutsah kei ding ahi.

NUIBOM**30 LAKH**

Pasal khat hi office apat a jinu agah text in.

Pasal- Thiem, tuni ka office building u achim min, vangphat um tah in tuol lama cigarete chep ma ka che kah ahijeh in kei ka suoh cha in, ka loi ho mi 20 a thi uve.

Numei-vangphat aum tave na, nang ima na ti lou chu.

Pasal-a thi ho khu mi khatna Government in 30 lakh apah di ahije.

Numei- Cigarette chep chep hih in kati nahi lou ham?

PALM SUNDAY

Mizoram a palm Sunday adia Saturday nia palm leaf bza a ajoh uleh mipi ho kichu thojeng, Bihari/Punjabi hon business hoitah hinte tia Palm Sunday jou Monday nia Jiribam langa Truck ejat hamkhat aga poh ule Joh lha but mong² talou u

JITHAH NEI PONGE

Jinu : Heo kathi nung teng leh jithah na nei kit dem?

Jipa : Ahilou lou kasei poi.. Jithah nei ponge

Ajinu : Asssh nanei angai e ajeh chu kipa nikho hihen lhaset nikho hijong leh ahin kithopi dia nanei angai e

Ajipa : Asshhhhh????

Ajinu : Promise bolta .. Kathi nung teng jithah nanei dichu o

Ajipa : Asssh Kanao nathi nung gei a nei khoh sah najal in henge jithah nei mai tange.

Ajinu : Achuti leh Ka car natol sah ji dem?

Ajipa : Hoilah tolsah ponge..Nang memorial a dia kakoi thim beh di he

Ajinu : Ka room naman sah dem?

Ajipa : Kanom poi koima lut sah ji ponge

Ajinu : Achuti leh Ka kengchot ho nase sah dem?

Ajipa : Hoija vang Nang keng size no 5 bou hija Ama anu size no 8 hija nang a iti ase thei di ham

**KOINONIA CHARITY WORK PROGRAMME
2019:**

Aman: Sis. Kimneo in, Kamdou Veng

Aphat: 9:30 AM

Anikho: Saturday (30/03/2019)

1. Lamkai: Bro. Santosh, Coordinator
2. Kipatna taona: Sis. Gracy, Canaan Veng
3. Thilpha bolna: Bro. Joseph, Advisor
4. Vahchoila: Bro. Henboi, Music Department
5. Tilkhoua: Sir. Gegen, Lecturer ECT
6. Mipi taokhomna:
7. Kikhen taona: Bro.Paocha, Leader Counselling department.

NOTE:

1. Hiche charity work hi kum khat a khatvei kibol ji ahin, alhangpia meithai le chagaa ho Kithopi dia lom ho kom a kibol ji ahi.

2. Sis. Kimneo jong hi apa um lou nunga anu toh hahsatah a hung khosa toupeh lhon ahin, a upa jong lamka bui lai a ahinkho anachan khah ahi. Mun dang a jong charity work kibol ji jongle eima ministry sunga Kithopi dia lom tah ahijeha hung kigong ahi.

2. Ministry min a thilpha bolna kigong jongle mimal a thilpha bol nom ho jong welcome ahie.

Organised by: KGM Counseling Department

BIBLE QUEST 2019

ORGANISED BY KBC YOUTH DEPARTMENT

PORTIONS	: EZEKIEL & DANIEL
LANGUAGE	: THADOU-KUKI
EXAM CENTERS	: ALL DISTRICTS
TYPE OF QUESTIONS	: OBJECTIVE
DATE OF EXAM	: 13 TH OCTOBER 2019, SUNDAY

PRIZES:

TOP 1	: Rs. 15,000 + Memento
TOP 2	: 10,000 + Memento
TOP 3	: Rs. 7000 + Memento
TOP 4-10	: Leather Cover Holy Bible + Memento

Notes:

1. Kol Houbung mi hileh athanom jouse pangthai ahi.
2. Exam Center hi District jouse le Eima umna India Khopi hoa kikoi ahijeh in nabotna thei ding mun naklithen thei ahi.
3. Application Form Rs. 30/- only napeh a na umna gamkaiya naklith nathel akikhoiye.
4. Thuchen hetbe nomhon KBC Youth Secretary Contact thei ahi.

Contact No. +91-9402243389

GOD AND ELECTION

Proclaim the Message: Be Persistent Whether the Time is Favorable or Unfavorable: Convince, Rebuke, and Encourage, with the most utmost Patience in Teaching.
2 Tim 4:2

By: Ginpu Haokip
(Lecturer- Servanthood Bible College)

1. Kilhen (election) kiti hi Pathen phudoh ahi. Vannoi namtin vaipi lah aman Abraham ana lhen a chua konna Israel te chu ana lhen kit a hitia chu Pathen nam lhen hung hui ahi. Hiche seh hi louvin Old Testament ivet a ahi leh kilhenna jat chom chom ana um in ahi. Pathen in Israel te chung a lengding a election ahin pat hin quality base a ana lhen ahi hiti chun Saul chu ana lheng masa pen in chujou vin Saul in Pathen thupeh ana palkeh jeh chun Saul chu ana paidoh in David ana lheng kit in ahi. Ahin David a pat in leng gam hi pagou dan in ahung um tan mimo le mithei le achapan apa panmun a khelding ti ahung hi phat in Pathen aki dalse tan hiti chun Israel leng gam corruptions pum dim ahung dim tan achaina chu Babylon gam ma.sohchanna ahung hi doh tan ahi. Ajeh chu ipi ham iti leh Pathen lhen lou le Path en phatsah lou leng hon gamsung ahin poh phat uva gamsung chu amasa a corrupt hung hi a achaina a chu mikhut a ki chai u ahi.

2. Election kiti hi Pathen hin pat ahin, hiche hin adoipen chu ahi leh amite kivai poh kitup nading, khantou na ding, ama khella vaihom ding thusei ding ahi. Hiche hin boldoh nading ah hin Pathen tun ahi lou le Pathen lhen angai in ahi. Pathen in atun lou le Pathen in apansah lou ho vang chu lamkai le vaihom a ahung pan teng ule gamsung khantou sangin boina, khehsuh na joh ahi jin ahi. Vannoi khang thusim ivet jongle Pathen lhen lou ama le ama kitung, sum thahat jeh ham, hem le thal thahat jeh a vaihom a pang mi ijat hamkhat a um in ahi. Vetsah nan, Hitler, Saddam Hussain, tu le tua N.Korean President pa, Nero, Herod...etc. Hiche ho vaihom na noiya hi mipi te damun a um bang jengu ahi. Ajeh chu ama ho hi Pathen pansah louva vihom ho chu ahui vin ahi.

3. Isei nom uchu eihon jong tuchung election a hi ipi ti pan ilah diu ham ti hi ahi. Christian khat hina jal a chu tuchung kilhenna ahi ipi ti pan ilah diu ham? Mihem mai ve lou va Pathen henga taona pum ma koi chu Pathen dei ham ti dong pumma vote ilah diu ngai ahi. Idei dei peh theilouna gam ma cheng ihu jong kahe nai, ahin tunin mipi te hon igam sunguva Pathen deilou kilhenna kum ijat ham ihin chepi jehuva tunia igam sunguva kikhelna um thei lou ahi hi gel doh pum in iti pan ilah diu ham ti gel ute. Ipi pi boljong leu hen Pathen a lunglhei lou le ima louva ki chai thou thou ding ahi

4. Christian ihi na dol uvah hin ibol jouseu hi Bible thuhil to kitoh in kibol thei tama henlang hileh tunia iboi na hou hi tampi um lou ding ahi. Pathen in adei chu koiham? Christian khat kahi na jal a ipi ti vote ka lhah di ham? ti ho eiho lah a um lou tobang ahi jeh in amin in Christian hijong leu hen avaihom na chamna le khantouna chule aphaattheina ho ichan jou lou u ahi. Tua hi kichat umpen hi tuchung election jeh in masang a kitoh sa mijat ahung kitoh mo dem? Thingnoi group ahung kibe dem? Mihem hinkho lou ahung um dem? tiho hi eiho election result ahi jin ahi. Sopi te eiho vang ipi pi soh jong le Pathen cha ihi nao heimil pou te

Hilchetna

April lhasung a kipat a hi Bible Quiz leh Puzzle ho hung kikoi talou ahi?

Ajeh ipi ham nahet nom am?

Akibol jing vang a, koiman lunglut na leh thanop na inei lou jeh uva, April issue a kipat hichi ho hi hung ki koi talou ahi. Member ho in ipiti igel uham vang akihe po in, koima a kon in donbutna ahung ji lou jeh in, thasetna akinei khatan ahileh kibol talou ahi.

Member hon thanopna inei lou uva, I support lou uva ahileh ijat kibol jong leh pan nabei ngen ahi. Hichi Bulletin akibol jeng vanga hi asim lou jong I umdiu jong tahsan aumin ahi.

A ipi chu hita leh Editorial ship hi hung kikhel vah ding ahitan, aban a hin mopo ho ding in vang tosot jom jing u hite ti hi lungset tah a katepna leh kataona ahijing e.

For query, suggestions and information, article

Contact the following:

Editor

Mobile: 8415934372 (Whatsapp)

Email: laldieux777@gmail.com

All Suggestions, comments are welcomed

GRADUATION

11th march 2019 (Monday) nikho in Trinity College & Seminary a kon in KGM member mi 4 in Graduation ana lathei uvin, KGM Family in akipapi cheh uve. Amaho chu ahileh: i) Gigin ii) Carolyn iii) Kimneo iv) Boilen v) Haoneo.

HOLY MATRIMONY

Date 28/3/2019 (Thursday) nikho in N.Songlung KBC Church mun ah Koinonia Member a pang Ng. Margret in hinkho a achenkhom pi ding Pastor Seiminlen Haokip toh houdan theng in Rev. Dr. Thongkhosei Haokip, GeneralSecretary KBC in gopna ana nei tan ahi.

Hitabang a vet ton theitah a kichen na anei hi aban a nungah golhang hon ihin jui jom pehdiu vin ikitem uvin, hitoh kilhon in Pathen in Christian insung ahin sem na ding hon ah vangboh jing hon taken

Graduation

Date 30/3/2019 (Saturday) nikho in SAIACS, Bangalore ah Koinonia Gospel Ministry a kinep pi umtah Gl. Letkhoson Haokip in M.Th (Theology) damsel a ahin chaitoh lhon in ikipa pi cheh uve.

**ATHOUDOH KIT TAI
(Easter Sunday Short Message)**

Kumseh in Easter Sunday nikho date hi akibang khapon ahi. Hijongleh hiche date hi March 22-April 25 kikh Sunday khat vang hitei ji ahi.

Jesu Christa thichu Judate Kalchuh kut phat lai anahi. Hiche kalchuh kut hi judaten kumsunga lhathah masa ni a anaman jiu ahi. Hinla hiche lhathah masa kiti jong hi vanoileiset phatbih kibah lou to toh a mun jousea kibang thei kit lou dia aumjeh in Houbung masa lai lamkai ho chun Lhache dolla kisim phat bih mangcha a ni 14 lhinni a chu simpana chuche jou Sunday ni masa ni pen chu Easter Sunday ni a man din kilol na ana nei jun ahi. Hiche lhasunga nikho chu ahung kihet chen teng leh Good Friday itih ni hija Easter Sunday itih nikho lha am ti hung kiphong doh thei ji ahi. Tunia Easter Sunday iman uhi 325 kuma Christian Bishop ho kikhom khom uva council a chu Easter nikho chu Sunday hijing ding ahi ajeh chu Sunday ni jingkah a Jesu chu anathou doh ahi ti kiphat sah na ana neiu ahi.

Billy Graham in adam lai jin hiti hin anasei je. "Christianity doulung pu mikhat anahi leng Jesu Chrita thodoh thilsoh hi kanekal pen ding ahi ajeh chu hiche thilsoh hi Christian te tahsan kingapna ahi".

Jesu thingpel a athin nithum nin athoukit e kiti hin avetsah chu Jesu chu Tahsa vou in Friday nilhah lamhin athin Sunday ni jingpi matah in tahsa tahin, atah tahin Avella thikit loudin athoudoh kit tai tina ahi. Jesu Christa damlai jin amatah in mithi anakai thou vin ahin akaitou Lazarus jeng jong chu nikhat le thikit dinga thou ahi. Jesu vang chuti chu hilou vin tonsot a thikit lou dia thou ahi.

Jesu Christa penmasang le penjou vin leiset chungah keima christa kahi tia kiphonga tampi anaum e, amaho chun seijui tampi jong ananei un ahi. Athupoh dohu deilou jehin anathat un ahileh athinung un kitah taha anungjuija kisei aseijui te jouseo jong khonung kinepna ding aneilou jehun amangthai ji taovin ahi. Ahin Jesu chungchang thilsoh vang achom ahi. Anung ajui u alamkai pao hinlai sangin athinung in atahsan nao akiben thichan geijin anapang cheh taove.

Jesu Christa thodoh thilsoh hi gospel thupha chomcha mai ahipon Christianity kibulphuna ahijoi. Jesu hi thina jouva anathou lou hile tunia ikinepnao jong moh hiding ahi

KIKHELNA CROSS
(Good Friday Message)

Intorduction:

Good Friday ahung lhunteng Jesu CROSS a athi akigeldoh masapen jin ahi. Ajehchu Cross a ahungthi, Cross chung a kona hung longlha thisan chun ngaidamna ahinlhut in, hiche ngaidamna chun mihemte le vannoi thilsem jouse thina dinmun a kona hinna dinmun a akheldoh ahi. Hiche Cross chun kikhelna lamdang ahinlhut in mihemten Pathen toh kakah a atansa kiguijopna chu hichun ahung jopkit a, kikhelna ahinlhut in ahi. Jesu Christa Cross a aki khetbeh chun mi thum in kikhelna ana nei uvin ahi.

1. Cross chun Barabbas a dingin kikhelna alhut in ahi.

Barabbas chu itobang miham? i) Barabbas chu sohchang (prisoner) minthang tah ahi (Matt. 27:16). ii) Barabbas chu khopi sung chonoh, mithat chu Rome sorkar douna a natong mi ahi (Lk 23:19). iii) Gucha michom jong ahi (Jn 18:40). iv) Barabbas kitipa chu thiding a athu kitansa hijongle hiche nikho jingkah chun ama chan ding chu Jesu chu akipen, ama kithana ding Cross achun Pakai Jesu chu khaisangin ana umtan ahi. Barabbas kitipa chu achonsetna ho jeha thidinga lomtah ahijeng vangin, ama kehl in Jesu Christa chu anathin, ama thoh ding khel in Jesu Christa in anthoh in ahi. Hijeh chun i) Tunia nangle kei ihin uhi, midang khat eiho khel a athijeh ahi. ii) tunia ihin uhin thina a kona hinna hung kondoh ahi ti aphotchetna ahi iii) Lhagaolam thudol a sei dingin Jesu thina chun eihinsah u ahi, Ama thina tailouvin hinna aumpoi.

2. Cross chung a kikhai pa dinga kikhelna

Luke 23:29-34 sunga Jesu jet le vei a kikhelbeh teni kihoulimna akimun ahi. Khatjoh pa chun aseijin eini hi athi dinga lom ihi lhon bouve, ahin Ama pa hi themmo na neilouva kikhelbeh ahi tia asej jouchun Jesu jaha 'Pakai nagam nalhun teng neihin geldoh in' tia ataona chu apet pet in Jesu ana sangpeh in, hichun hiche gucha michom pa ding chun thina a kon in hinna a kikhelna anapen ahi. Cross chung a Jesu gucha michom ni kakah a aki khetbeh chun mihem jouse a dinga kikhelbeh ahi vetsahna ahin, Cross phunga chun mihem ho jatni in hopkhen ahin ahi. Jatkhath hochu atahsan a hinna chang ho ahiuvin, chule adangho chu tahsan louva thina mun lhungho ahiuvin ahi. Themmo kichan a kikhelbeh pa, athi dinga umpa chu tonsot hinna mun alhut jeng thei leh tunia jong Cross a hung thi Jesu chun nang le kei jong i hinkho uhi apet pet a akikhelsah jengthei ahi.

3. Sepai Jalankai pa (Centurion) dinga kikhelna

Gospel masa thum hon Rome sepai Jalankai pa le sepai phabep hon Jesu atahsan aphonhdoh u thusim akisun in ahi. Rome Sepai sunga Sepai Jalankai hohi sepai jakhat chung a lamkai, kichuhna phatah nei, mi hangsan, mitha khohsalou mi ahiuvin ahi. Cross a mi khetbeh chu phatseh a abol jingu nato khat ahibouvin ahi. Ahin, hiche Jew mipa kikhelbeh a Ama umchan dan le thilsoh ho chun "hiche pa hi Pathen chapa dihtah ahi" ti aphonhdoh in, Sepai Jalankai pa dingin kikhelna apen ahi.

4. Nang le Kei dinga kikhelna Cross

Jesu Cross a akikhelbeh nikhoa Cross koma umho chun kikhelna anei uvin ahi. Tunia Cross koma ium uva, Cross phung chu ijot uleh nangle kei a dinga jong kikhelna Cross hiding ahi. Ajehchu, hiche Cross chu thaneitah ahin, Pathen ngailutna le loupina kiphondoh na Cross ahin ahi. Jesun aseiyee, 'koima pakai ni soh ahitheipoi' (Matt. 6:24), Pathen chun thangtom Pathen ahin, Ama tailou pathen dang nanei loudiu ahi tin Pakai Pathen in amite ana hilchah in ahi. Vannoi toh kihouthei hi Pathen lunglam ahipoi (Jm. 4:4), kilhen uvin, vannoi toh kihouthei a Pathen galmi nahi ding ham, ahilouleh, Cross nalhen joh a, hinna a kikhelna nanei ding ham?

5. Ding namun kicheh angaiye

American Civil war lai jin mikhat pa hin kojoh panpi ding ham ti ahet theilou jeh in Confederate te Sangkhol aki ah in, Union langho toka (trouser) akichen in ahileh, kikaptona ahung um phat in Union lang hon a sangkhol lang akap pih uvin, Confederate langhon a toka lang ana kap pih uve akitin ahi. Hoilai muna na ding ham ti akicheh angaiyin ahi. Pathen a dingin akikah aumtheipoi. Na dingna munchu Cross phung hinam?

Thusim Chomcha

Phat khat lai jin England gama mi hoasa theitahte in mun a nekhom anei lai uvin chapangpamlam a kichem holah a khat chu twikul (pool) a alhalut tan, alhalut pa chu hiche inneite honlei bol a pang (gardener) teni nupan ana huhdoh in ahi. Hiche chapang twi a lhalut pa chu Winston Churchill ahi. Churchill nu le pa chu akipah behseh lhon in gardener teni nupa koma chun 'ipi kabolpih lhon ding ham?' tia adoh leh amanin

jong kachapa lhon hi Medical College a kai leh kadei lhon e atilhon tan ahi. Khonung phat sottah jouvin, twi a lhalut pa Winston Churchill chu Englang Prime Minister in ahungpang tan ahi. Nikhat hi nasatah in ahung dammo tan ahileh England gam sung pumpi a louthem penpa akou uvin ajensah tauvin ahi. Hiche louthem pa chu Dr. Alexander Fleming ahin, Pencillin damdoi mudoh pa chu ahin, chuleh aneolaiya twikula kona anahuhdoh teni nupa chapa, Churchill nulepa in Medical college a akaisahpa lhon chu anahin ahi. Ahung damdoh jouvin, Churchill in “kei banga hinkho nivei jen mikhat in ahuhdoh hi umbek ponte” anatin ahi.

Tunia Cross a kikhenbeh Jesu hi eiho eisempao chuleh Ama mama eihuhdoh uva hungpang kit Pa chu ahin ahi.

NGAITO TEM IN

Khat vei chu tehsepu khat hin rel station ah rel nga pum in newspaper asim in, khutdo chapang kum 9 mi bep hin, “Hepu, lungset in paisa nei pe’n. Tuni nilhum in imacha ka ne pon, ka gilkel lhek tai” tiin paisa athum e. Tehsepu chun phatah in agah ve’n, a kivonna akon chun a khoto lhek in; a sakhaio sunga nehthei um chu a ladoh in chapang chu ape e.

Chapang chun kipah tahin akilah loi jin, gang tahin ahong in, ane pai tai. Tehsepu chun a gilkel dan chu ahen athil neh chu phate chan avelha e. Chutia tui taha aneh jing lai chu phulou helouvin ahung khang dot in athil neh chu anga’n, aneh moh chengse chu achun tup tai. Hichun tehsepu chun lunghang thim tahin, “Neh dinga ka peh na hin, nen boma pai ding na got ham? Abonchan ne chai in, na pai theilou ding ahi.” tiin aphoh tai.

Chapang beng a chun mitlhi ahung luong jin jen in, “Hepu, pai ding ka got ahi poi. Hiche nehding nei peh hi keima changa ka neh jou thei ahipoi. Ka nao kum 6 miin tuni nilhum in ima ane poi ti ka hin geldoh in, ka neh be theilou ahi tai. Ka nao chun, ‘Ka u in nehding eihin pohpeh ding ahi’ tia ngahlel taha eina vetlhih jing ding ahin, lungset taha ka nao dinga ka pohpeh thei ding ham?” tiin tehsepu koma chun athum tan. Tehsepu lungthim chu akisun banga na in hiche chapang thusei chun atongkha lhek in, chapang chemang chan chu agal vet tan ahi.

Contd/-... (Ngaito temin)

Mother Teresa in a lungthima cham jing leh a haimil theilou tia asej ji chu, “Phat sottah nehding neilouva um Hindu inko khat komah anchang ka pe’n, anu u chun mitlhi va chut chut pumin kipathu asej jin. Hinlah, kidang tah mai in anchang chu mun ni ah kibang chetin ahomkhen in, chu in anchang chu apo’n apotdoh pai jin. Chomkhat jou chun ahung kile kit in, ‘Anchang chu hoiya na gakoi ham?’ tia ka doh phat chun hiti hin ei donbut in, ‘Ka inkom uva hin Muslim inko keiho tobanga nehding neilou aum uvin, anchang nei peh chu akekhat ka hop ahi.’ Ngailutna, khotona leh lainatna hin gamgi anei poi...” tiin ana seiyin ahi.

Albert Schweitzer in, “Hiche mi noinungjoho leh vaicha taha i gelhou hin mi haosaho sangin ngailutna, khotona, lainatna leh midangho hinkho hetthemna anei jouve.” tin ana sei jin ahi. Tahbehin, hiche vaicha leh noinungjoho hi amaho deilhen vanga um leh hitobang ding hi ahi deh pouvin ahi. Achung uva thil lung hohi hetthem theilou kom nei tei uvin te. Hithei hileh adei jouseu nei thei dinmuna din chu nom namau in te. Hinlah, amaho din hichu vana ga tobang ahi. Phatkhat kom leh Pathen thilgon dan hi mihem mihemna akonin hetthem ahah lhek jin ahi.

Hijeng jongleh, Pathenin i chung a vai ahop dana hi lhase thei i hi pouve. Ajeh chu tu dinmuna i din theinau jong hi AMA vang ahi ti hejing u te. Tahsan chate dia Ama chu phatthei chamkim hung konna ahin ahi. Ama i tahsan uva, athu i jop phot u leh i dei leh ngaichat hou chu imu tei diu hilou ham? I dei leh ngaichat hou chu kon ei peh diu ham? Ei pe thei u leh ei pe diu um sun chu Ama bou ahi. “Peuvin, chutieleh peha na um diu ahi.” akitin ahi...

Love cures people – both the ones who give it and the ones who receive it.

~ Karl Menninger

PHOTO SECTION



Ng. Margret kichen na a KGM aga kalsong cheng

Ng. Margret leh a inneipu Pastor Seiminlen Haokip



KGM makaina noi a Ng. Kimneo te inn a Charity Work ga kibolna (30/4/2019)

KGM Bible Student Graduate laho lim phabep

